


中國古典文學基本叢書

中華書局



劉克莊集笺校

第八冊

中國古典文學基本叢書

劉克莊集箋校

第八冊

〔宋〕劉克莊 著  
辛更儒 校注

中華書局

# 劉克莊集箋校卷六七

按：本卷外制，起嘉定二年十二月，迄三年二月，中書舍人任內所撰。

## 外制

### 黃伯訖除司農寺簿(二)

朕惟嘉定初元，寧考總攬，一時名臣多出親擢。爾考於是時爲諫官，爲柱史，言論風旨，聞於天下。朕不及識，追懷其賢。爾傳受於父兄，講貫於師友者詳矣。由列院而贊大農，以才選，非直以家世也。雖孝子顯揚，固不止此，然有司出納，其可忽諸？益殫賢勞，克紹先訓。可。

#### 【箋注】

(二)黃伯訖，弘治撫州府志卷八宋牧守：「黃伯訖，朝散大夫，咸淳二年。」餘無可考。

## 武功大夫帶行御器械前改差知江陰軍張稱孫特換朝奉郎<sup>(二)</sup>

朕於疏遠羈旅之臣，有能以才學自著見，往往度越拘攣，拔擢而任使之，況其親近者哉？爾文恭之甥，嗜學工文。再領漕薦，嫺雅風流，一時籍甚。縻以勇爵，非其志也。顧官品已崇，且佩貳千石印綬矣。換班之命，蔽自朕心，雖員外之秩稍卑，然郎監之選甚清。先朝如米芾如吳璠，皆以肺腑之親而擅詞翰之美。爾其勉哉，以對殊渥。

### 【箋注】

(一)張稱孫，道光江陰縣志卷一一宋知軍載景定元年爲楊履之，武節郎，二年爲龔準，朝奉郎，孫應鳳，承議郎，三年爲李壘，奉議郎，未載張稱孫，知其雖有任命，隨即除將作少監兼右曹郎官，實未到江陰任。據右制「文恭之甥」語，知張稱孫實理宗生父榮文恭王之婿。雍正浙江通志卷二三八載蕭山縣宋待制張稱孫墓，據紹興府志，在湘湖龜山，石獸俱存。周密雲煙過眼錄卷三謂教化參政所藏癸字鼎，初出蕭山張稱孫。而六藝之一錄卷二謂爲元張稱孫家物，則其人已入元矣。

## 張稱孫除將作少監兼右曹郎官

人才各有所長，若其儒雅足與士大夫相頡頏，顧使之右纍鞬而左鞭弭，用違其材矣。爾以藩邸之姻，有士林之譽。屢上春官，鐵硯欲穿而壯心未已，豈與噲伍者哉？少匠尚書郎，皆高選也。可以展究爾之才學矣，往其欽哉。可。

## 黃應春除宗正寺簿

麟寺名掌屬籍，實以纂述瑤編爲職，地清天近，非名流不輕授。爾經明而行修，年高而德邵。書所謂耆德，語所謂先進，詩所謂典刑人也。繇博士贊司宗，一代大典，皆與討論焉。爾既兼史官，學識之長，朕非責俗吏簿書之務。可。

### 【箋注】

〔一〕黃應春，寶慶四明志卷一〇：「淳祐四年留夢炎榜，黃應春，戊戌特科，甲辰正奏。」清朱彝尊經

義考卷一〇八：「黃應春，奉化人，嘉熙二年進士，官至朝散郎知處州，著有詩說。內翰應儼，左史黃自然繳進。送監看詳，除國子學錄。」

## 范丁孫除大理卿<sub>(二)</sub>

范氏之望於蜀也久矣，其種德積善非一世，其象賢繼志非一人。門戶之盛，爲衣冠美談。典刑文獻，於爾乎在。修於家則有禮有法，出而仕則有猷有守。累贊闔畫，洊將使指。身逃乎西土，而名動乎京師，朕將引以自近焉。先朝故家萬里出峽，宜有以寵異之。棘卿高選，一武禁除。爾其疾驅，以對簡拔。可。

### 【箋注】

(一)題，范丁孫，宋史卷四五一忠義六趙良淳傳：「趙良淳字景程，居饒之餘干，太宗子恭憲王之後，丞相汝愚曾孫也。……初以蔭爲泰寧主簿，三遷至淮西運轄。浮湛冗官二十餘年，馬光祖、李伯玉、范丁孫交薦辟之，卒不振。」范丁孫僅於此見載史冊。

## 文天祥除正字<sup>〔一〕</sup>

掄魁登瀛，故事也。然始進大率以虛名，既久乃知其實踐。爾則異是，初以進士奉董生之對，繼以卑官上梅福之書。天下誦其言，高其風，知爾素志不在溫飽矣。麟臺之召，何來之遲？語有之：「居大名難。」又云：「保晚節難。」爾其厚養而審發之，使輿論翕然曰：「朕所親擢敢言之士。」可。

### 【箋注】

〔一〕題，文天祥，南宋館閣續錄卷九正字景定以後：「文天祥字宋瑞，吉州人，寶祐四年進士及第，治詩賦。二年十月以主管建昌軍仙都觀除，三年四月供職兼景獻府教授，五月爲校書郎。」文天祥，宋史卷四一八有傳。

## 謝堅除司農卿

郡國賦輿之廣，朝廷廩兵祿吏之衆，而倉庾氏乃無宿儲。使賈誼生於今日，見公私之積如此，其憂當何如哉？孰能爲朕修九扈之職，以紓一時之急者？爾精明足以燭姦欺，密察足以防滲漏，鋒銳足以投肯綮，朕所爲選擇而使也。夫包茅是問，逋租負殿，其來已久。然馬力窮則輿駭，弓張不弛則絃絕。郡邑有貧富，災傷有輕重。於斯時也，御取予以道，課殿最以公，爾必有以處此。算計見效，由九卿擢兩制矣。可。

## 林疇黃環除大理評事<sub>(二)</sub>

司馬遷有法家者流之目，韓愈有大理不列三后之論，信斯言也。臬謨呂刑，見黜於書矣。廷尉平佐其長，決天下之獄，非中其科者不授。疇縣譜，環幕辦，皆有可紀，並升棘屬，讞筆高下，民命死生繫焉。其殫乃心，毋爲遷愈所議。可。



【箋注】

〔二〕題，林疇、黃環，淳熙三山志卷三二：「淳祐四年甲辰劉夢炎榜，林疇，甲科，字用錫，貫紹興府。」  
黃環無考。

## 朱子中除太社令〔二〕

用門閥取人，非古也。然曰胄子，曰象賢，虞周盛時，亦何嘗不尚論世家乎？爾輔臣之子，能讀鄴侯之書，而遵萬石君之訓者。擢真周行，將以進其德而老其才也。爾其勉諸。可。

【箋注】

〔二〕題，朱子中，乾隆福建通志卷二四載朱子中爲漳州錄事參軍。

## 錢庚孫除將作監簿<sup>(二)</sup>

國家用人或取之素士，或取之世家，惟其才而已。爾奕葉貴盛，固不與寒畯爭進。然鵷行鷺序，宜參用傳世家文獻知臺閣典章者。由郡丞佐繕監，益厚涵養，以待器使。可。

### 【箋注】

(二)題，錢庚孫，宋史卷四三八黃震傳：「時錢庚孫守常，朱熠守平江，吳君擢守嘉興，皆倚壁倖厲民。華甫病革，彊起劾罷三人，震贊之也。」據咸淳毗陵志卷八，錢庚孫以景定三年十一月自奉議郎軍器監簿出守常州，四年正月別與差遣。

## 周漢國公主府從人葉氏封恭人<sup>①</sup>

古之稱女婦之賢者，必歸功於保姆。爾執事貴主左右，昔見其衣褐，今見其築館，可  
以言勞舊矣。其錫溫恭之號，俾霑優渥之恩。可。

【校】

①前「人」，原闕，據永樂大典卷二九七二人字韵引右制補。

## 右武大夫閣門宣贊舍人特除金州駐札御前諸軍都統制

### 兼知叙州張桂特贈容州觀察使〔二〕

聲罪致討，勇於祭纛之行；殺身成仁，壯矣死綏之節<sup>①</sup>。追懷英概，加峻愍章。具官某，躬秉戎韜，氣吞叛壘。危機文急，甘效命於顏行<sup>②</sup>；大勢不支，猶握拳而血戰。妖氛未潰於塞外<sup>③</sup>，將星忽隕於營中。邊候亟聞，朕懷震悼。爰涉廉車之秩，以爲幽壤之光。噫，李陵之罪通天，惡名遺臭；張巡之鬼厲賊，忠骨猶香。可。

【校】

①「壯」，原作「狀」，據四部叢刊本改。

②「文」、「顏」，四部叢刊本作「太」、「戎」。

③「潰」、「外」，原作「清」、「也」，據四部叢刊本改。

## 【箋注】

〔二〕題，張桂，宋史卷四四九忠義四許彪孫傳：「景定二年，劉整叛，召彪孫草降文，以潼川一道爲獻。彪孫辭使者曰：「此腕可斷，此筆不可書也。」即閉門與家人俱仰藥死。整既降，遂引兵襲都統張桂營，桂及統制金文德戰死納溪，曹贛闔門死之。」昭忠錄：「制置俞興、都統張桂、金文德等收復兵逼城，整出兵江山，大戰敗走，逐北至城門，僅得人。氣息垂絕，興弗知，不能乘勝奪門，乃以日暮收兵。明日整乘城拒守，乞納琳濟師，興復圍城，城中勢甚窮促，而元兵來援。八月，摘圍城兵，命都統屯達晨往迎敵，逮午復摘東門圍城卒往助，易他卒補缺。更替未定間，整登城，見而悟，亟命勇士從暗門突東圍，始惟百十卒，繼乃大至，衝興師大潰，興得小舟奔南斫黃市，還重慶。達聞敗，亦遁，附馬尾渡江。士卒擁溺者十八九，流屍蔽江而下。惟桂、文德力戰，不敵死之。桂嘗守老鼠隘，軍中號曰：「老鼠張桂誓取整。」一日整令呼曰：「吾今日放猫捕矣。」桂以氣吞整，不戒，果遇害。事聞，贈桂容州觀察使，文德復州團練使。」

## 武翼大夫閣門宣贊舍人特除重慶府駐札御前保定諸軍

都統制金文德特贈復州團練使<sup>①(二)</sup>

環高城而攻，忠存討逆；鑿凶門而出，義不求生。爾勇冠諸軍，誓梟叛將。赤心衛

上，以國士報之；白刃在前，曰男兒死耳。力已窮而鬥愈急，骨可朽而名不埋。俾陟遙團，以光幽壤。噫，馬革裹屍之志，豈不壯哉？豹死留皮之言，復何憾矣！可。

【校】

①「重」，原闕，逕補。

### 迪功郎錢昌大除籍田令<sub>(二)</sub>

選人開朝蹟，殊擢也。籍令列奉常，清選也。爾家世貴盛，而能安於平進。選擇之異，蓋以其尚有典刑之故。爾益熏沐，以對寵光。可。

【箋注】

(二)題，錢昌大，曾添差爲臨安府通判，見咸淳臨安志卷五〇。

## 工部侍郎常挺除兼侍講<sup>(二)</sup>

陪細氈之列，久奉燕閒；加重席之榮，特優鴻碩。具官某，凌雲之賦籍甚，凝霜之簡凜然。拂袖而素節無虧，予環而丹心不改。汝垂之命，非止鳩工；仲舒之文，尤宜爲誥。方賴辰猷之告，俾超夕說之聯。噫，求王人之多聞，吾自樂此；得講師之三昧，爾交修予。可。

### 【箋注】

(二)題，常挺，已見。宋史卷四二一常挺傳：「遷太常少卿兼國子司業兼國史編修實錄檢討兼直舍人院。遷起居郎權工部侍郎兼直學士院，遷工部侍郎、給事中、右諫議大夫。」

## 馬世綸帶行太府寺簿尚書省市舶所檢閱官分司慶元府<sup>(二)</sup>

鄞地瀕海，夷琛輻湊。異時領以使者，後俾郡丞兼之，權稍輕矣。爾家學縣譜，有聞

於時。其以外府屬，往任互市之事。嗟夫，寬征則海之賈可招，無欲則浦之珠可還也。選擇而使，可不勉哉？可。

【箋注】

〔二〕題，馬世綸，嘗知仁和縣，見咸淳臨安志卷五一，餘皆無考。

包恢磨勘轉中大夫

秩宗之官，極寅清之高選，考課之法，必積累而序遷。具官某，世之達尊，國之大老。持橐人侍已八十餘，焚稿盡規凡再三告。士論咸推其晚節，吏銓適會其年勞。爰出新綸，俾升華秩。噫，周小宗伯，初豈計於一階？秦中大夫，今遂班於五品。

趙與訾依舊寶章閣待制除江東路轉運使兼淮西總領〔二〕

職清地禁，頃已列於論思，師老財殫，今莫難於漕總。思其強敏，起之燕閒。具官

某，知微知彰，有猷有守。爲諸道廉訪使之首，肅若丰稜；合比年京兆尹而觀，恢乎游刃。卷懷徑去，注想未忘。厥今江沱之勢稍安，塞下之積未實。甲士張頤之望切，計臣束手而技窮。緩則乏興，急將聚怨。朕直爲廩廩，孰能飽萬竈之屯？爾益辦多多，可並綜二臺之事。往任笏鞭之責，併提齟茗之綱。渭濱之運法可尋，湟中之羅政宜講。必民無加賦，必軍有宿儲。少紓識者之憂，不□□□□□□□。昔王旦云民力竭矣，有味其言；邵雍曰諸賢□□□□□□之意。可。

【箋注】

(二)題，趙與訐，景定建康志卷二六轉運司題名未載，蓋其任江東轉運副使兼淮西總領在景定二年底以後，爲志所不及。

右武大夫陳天應團結有勞轉左武<sup>①(二)</sup>

功宜懋賞，詎容銓法之拘；官至橫行，見謂武□□□□。具官某，以材自奮，遇事敢爲。頃緣獫狁之侵，□□□□隆之募。立表下漏，頗整肅於軍容；執鞭屬橐，□□□□於環



列。有司言狀，如格進官。噫，朕居重御輕，嚴□□九重之制；爾自右遷左，蓋古人二廣之遺。可。

【校】

①「結」，四部叢刊本作「練」。

【箋注】

（二）題，陳天應，事歷無考。

### 謝  除軍器少監

朕方圖攘夷復古之功，講修車備械之政。凡□□□□戎監者，皆遴選也，況於帥其屬者乎？爾槐□□□□椒塗之懿戚，倍清廟髦士。歷京兆亞尹，皆戎之拜去；郎宿卿月，猶健者之登梯。可躡級①。